

Caso Portulaca ta continua cu detencion di otro sospechoso

Manera ta conoci, caso Portulaca a cuminsa na juni cu detencion di tres persona na e momento ey, recientemente un otro persona tambe a keda deteni pa e mesun caso aki e cual ta un investigacion di Landsrecherche tocante permisonan di estadia otorga.

Landsrecherche, bao guia di hues-comisario y Ministerio Publico y den cooperacion cu Cuerpo Policial di Aruba y RST (Recherche Samenwerkingsteam), a tene doorzoekingsnan awe na 6 sitio, esta, dos cas, dos negoshi, Bestuurskantoor (Ministerio di Integracion, Labor y Energia) y DIMAS. E doorzoekingsnan aki a tuma lugha den cuadro di un investigacion di Landsrecherche di posibel delitonan di corrupcion y otro hechonan castigable relaciona cu otorgamento di permisonan di estadia entre 2020 y 2022.

E investigacion aki a bira conoci bou di e number di Portulaca. Durante e doorzoekingsnan, a tuma gegevensdragers (portadornan di dato) y ad-



ministracion den beslag. Te na e momento aki, 3 persona a keda deteni.

E investigacion di Portulaca ta draai rond di e pregunta si companianan por a obtene permisonan di estadia pa nan empleadonan a base di motibonan cu no ta cuadra cu ley.

E doorzoekingsnan di 4 di juni a keda conclui. E investigacion penal ta sigui. Ministerio Publico no a duna mas informacion. Den caso di desaroyonan particular den e investigacion esey lo wordo comunica despues pa medio di un comunicado di prensa, segun loke Ministerio Publico mes a señala e tempo ey.

Recientemente, un otro per-

sona relaciona cu e caso a ser deteni e cual durante interrogacion na Landsrecherche e sospechoso aki deteni a bira malo.

Diaranson merdia a drenta informe di cu durante interrogacion e sospechoso su presion a bay haltu y mester a yama pidi ambulans p'e. Na yegada di e ambulans nan a atende y el a relaha y asina por a sigui cu su interrogacion. Atardi e vehiculo di transporte por a hib'e back na unda e ta deteni.

Di su parti, e mandatario en-carga cu e cartera di Integracion, Energia y Labor, Glenbert Croes a indica cu e caso aki, ta un investigacion cu ta data di aña 2020-2022. Minister Croes a tuma e cartera



di integracion na November 2021, cu e meta pa traha na combati corrupcion den e departamentonan bou di su encargo, pero specialmente den e proceso di otorgamento di permiso na esnan cu ta cumpli cu e rekesitonan. Pa e motibo aki, el a instrui na e departamentonan concerni, pa duna ful cooperacion na e investigacion cu Ministerio Publico ta haciendo. Tambe, e mandatario ta confirma su pleno confiansa den e imparcialidad, eficiencia y efectividad di e investigacion di Ministerio Publico, paso ta asina so lo por duna claridad

na dudanan, erornan cu ta wordo cometi.

Un di casnan cu landsrecherche a bishita relaciona cu e investigacion, ta cas di e mama di minister Croes, na unda e fundacion 'Union ta Forsa' cu a wordo reactiva pa campaña

2021 y cu despues di eleccion ta inactivo. Ta importante tambe pa tuma nota cu e señalamiento di personanan y/of empresanan, no tin nada di haber cu e fundacion cu a ser lanta pa minister Croes su campaña, segun e minister mes a senala den un comunicado.

Stichting Monumentenfonds Aruba ta bay haci un open Monumentendag 15 di september

Stichting Monumentenfonds Aruba kier pa comunidad henter uni na nan y asina explora e historia rico y e bunita arkitectura di e isla. Dia 15 di september proximo e comunidad di Aruba lo tin e oportunidad di bishita y drenta 13 monumento y edificionan historico den e area di Oranjestad.

E dia special aki ta bay ofrece un oportunidad pa bishita y siña tocante algun monumentonan y sitionan historico mas valioso di Aruba y tur ta bay ta habri gratis. Pa prome biaha Stichting

Monumentenfonds Aruba ta organisa e Open Monumentendag den colaboracion cu Stichting Nederland Monumentenland cu ta encarga cu Open Monumentendag na Hulanda. Na Hulanda lo celebra esaki durante tres dia largo pero na Aruba lo ta dia-domingo 15 di September.

E publico lo por registra na e monumento di Casita Geel y for di akinan cuminsa nan recorrido den Oranjestad y bishita e diferente Monumentonan, participa na actividadnan pa grandi y chikito cu e posibilidad di gana varios premionan manera Weekend



stay, travel vouchers, sunset sails, dinners y hopi mas.

Entre 10 or pa 3or e monumentonan lo ta habri pa publico y di 3 or pa 5 or lo tin un evento di clausura pa entrega di premio pa e publico cu a participa na e diferente actividad y disfruta di e musica di e banda musical Tsunami.

Tur informacion lo ta obtenibel online via di e website y app di open Monumentendag y tambe lo tin informacion disponibel na e diferente edificio.

Lo por disfruta di entre otro baile y musica, workshop y actividadnan pa mucha,

benta di artesanía y cosnan tipico di Aruba, Instameets y competencia di fotografia di e proyecto di Lang Leven het Erfgoed, tournan exclusivo y hopi mas.

Pa e motibonan aki, Stichting Monumentenfonds ta invita comunidad di Aruba pa dal un keiro cu amigonan y famia, pa descubri e historia of simplemente disfruta di un dia diferente.

Si tin boluntarionan cu lo kier duna un man ainda por registra via di e website di arubavolunteers.org

